

Date – 05/12/2025
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Chief Minister Pu Lalduhoma chuan Myanmar buai tirh phat atangin sahimna zawnga Mizorama lut Zofate buaipui an nih thin thu leh theihtawp an la chhuah zel thu a sawi.
2. Kumina Thingtam lo thlengah Mizoram district 11-a kuthnathawktu chhungkua 5,317-te buh leh bal leh thlai thar tur beisei atanga za zela 42 point 06 chu sazu puangin an seh chhiatsak.
3. Prime Minister Narendra Modia leh Russian President Vladimir Putin te chu vawiinah New Delhi-ah an inkawm dawn.
4. Parliament chuan nimin khan Cenrtal Excise (Amendment) Bill, 2025 a pass.

<><><>

CM

Chief Minister Pu Lalduhoma chuan Myanmar buai tirh phat atangin sahimna zawnga Mizorama lut Zofate buaipui an nih thin thu leh theihtawp an la chhuah zel thu a sawi.

Nimina Institute of Chin Affairs (ICA) ten Aijal Club-a "Together for Humanity" Friendship Dinner an buatsaih a hmanpuinaah he thu hi sawiin Chief Minister chuan khawvel hmun hrang hranga cheng Chin mite din Institute of Chin Affairs (ICA) hnathawh hrang hrangte ropui a tih thu leh Chin mipui zawng zawngte tan malsawmna ni zel tura a duh thu a sawi a.

Chief Minister chuan an harsatna tawh mekte tha taka an hmachhawn theih nan Chin state chhunga zofate inlunguala, zai khata luangza tura a ngen thu a sawi a. An inlungual loh chuan midang tan hneh awlsam tak an ni reng dawn tih sawiin thukhat vuain, inkaihhruaina pakhat hnuaiah, tum thuhmun neiin awm turin a sawm a. Inthianthatna zanriah an kil ho pawhin chu chu a thiltum a nih thu sawiin tupawhin India sorkar zah takin thil ti zel se a duh thu a sawi bawk a ni.

<><><>

LESDE MINISTER

Labour, Employment, Skill Development & Entrepreneurship Department Minister Pu Lalnghinglova Hmar chuan Mizo thalai ei ringawt, ei tur zawng ve lo an tam chu pawia a tih thu a sawi.

Nimina Synod Multipurpose Training Centre (SMTTC) in SMTTC Hall, Mission Vengthlanga ‘Graduation Day’ an buatsaih a hmanpuinaah he thu hi sawiin Minister chuan hnathawhah hlawh tlem a zahthlak loh thu leh hlawh neih loh a zahthlak zawk

tih sawiin, trade hrang hranga ‘thiamna’ zirchhuak thalaite chu an hna bul tannaah hlawh a sang lo deuh a nih pawhin taima taka an thawh chuan hlawhtlinna a awm tih a sawi a. Minister chuan hnathawk lo thalai an tam laia eizawna kawng dap tura intuai hriam Mizo thalai thahnem tak an awm chu lawmawm a tih thu a sawi a ni.

Kuminah hian SMTC atangin zirlai 109 in an zirchhuak a. Women’s tailoring ah mi 39, Men’s tailoring leh Electric wiring & repairing ah mi 14 ve ve, DCA ah mi 27, Beauty culture ah mi 9 leh Mobile repairing ah mi 6 te an ni.

<><><>

EXCISE ENFORCEMENT DC VISITS CHAMPHAI

Excise & Narcotics department Enforcement Deputy Commissioner Pu Ngurthanzama Sailo chuan an department a thawktute chu hna an thawhna kawngah pawisa, zu leh ruihhlo dang hmanga thlemna te an tawk fo dawn a, chung hunah chuan an hna rinawm taka thawka, thlemnate hnawl ngam turin a fuih.

He thu hi nimina Champhai-a Excise & Narcotics department office-Conference hall a amah lo hmuahna hmunah sawiin Excise & Narcotics department a thawktute chu an hna hi zu leh ruihtheih thil kaihnawih an nih avangin heng ruihhlo lakah hian a fihlim ngei ngei a ngai tih a sawi a, thlemna an do hneh chuan an hnathawh kawngah an huaisen phah dawn a ni a tih bakah hun vawn dik ngaipawimawh turin a fuih bawk.

Pu Ngurthanzama Sailo hian nimin chawhnu khan Khawzawl leh Champhaia an department Office te tlawhin an hnathawh dan leh an mamawhte a enpui a.Enforcement, Excise & Narcotics department hnuaiah Constable 30, Inspector 3 leh Driver 5 lak thar an nih tur thu a sawi bawk.

<><><>

FORMER MIZO GUV DEMISE

Mizoram Larsap hlui Swaraj Kaushal chu nimin khan New Delhi ah kum 73 mi niin a thi.

Swaraj Kaushal hian nimin tlai khan a awm na a tih thu sawiin rang takin AIIMS pan pui ni mahse, an thlen chuan Doctor ten a thih thu an sawi a, amah he Senior Advocate a ni bawk.

Swaraj Kaushal hi Kum 1990 February ni 8 khan Mizoram Governor atan lakluh a ni a, kum 1993 February ni 9 thleng Mizoram Governor nihna a chelh a, Mizoram Governor atana lakluh anih hian kum 37 mi niin India rama Governor naupang ber a ni.

Prime Minister Narendra Modi chuan Mizoram Larsap hlui Swaraj Kaushal chu a ui thu sawiin a dan hriatna hmanng tangkaiin khawtlang nun siamthat kawngah nasa takin hna a thawk thin a ti a, India Governor zinga naupang ber anih bakah Mizoram hmasawn nan nasa takin hna alo thawk tawh thin a ti a, Parliament lamah pawh sulhnu ropui tak a nei tih sawiin a kalsan tak a chhungte a tawrhpuoi tak zet thu a sawi bawk.

Larsap General (Rtd) Vijay Kumar Singh pawhin Mizoram Larsap hlui Swaraj Kaushal a ui thu sawiin Mizo mipuiten a thihna chu an tuar takzet a ti a, a hnathawh that te an hre reng dawn tih sawiin a kalsan chhungte a tawrhpuoi takzet a ti bawk.

Chief Minister Pu Lalduhoma pawhin Mizoram Larsap hlui Swaraj Kaushal a ui thu sawiin khawtlang nun siamthat kawnga a hnathawh an hre reng dawn a ti a, zah takin Mizo mipuite an thlah tih sawiin a kalsan tak a chhungte an tawrhpuoi thu a sawi a ni.

<><><>

RODENT

Kumina Thingtam lo thlengah Mizoram district 11-a kuthnathawktu chhungkua 5,317-te buh leh bal leh thlai thar tur beisei atanga za zela 42 point 06 chu sazu puangin an seh chhiatsak.

Mizoram sorkara Disaster Management & Rehabilitation department hnenah Agriculture & Farmers Welfare department chuan Thingtam vanga sazu puang hi State Specific Disaster-ah puang turin an ngen a, mahse, State Specific Disaster a puan kher ngai loin State Disaster Respond Fund hnuai norms awmsa atangin sazu puang tuartu loneitute hnenah tanpuina pek a ni dawn.

Disaster Management & Rehabilitation department hotute hnen atanga Akashvani News, Aizawl thudawn danin, rawthing tamin a hrin sazu puang vanga loneitute harsatna tawh hi Agriculture department chuan State Specific Disaster a puang turin an ngen a, Amaherawhchu sazu puangin loneitute buh leh thlai a khawihchhiat vanga tanpuina pek tur hi State Specific Disaster-a puan kher ngai loin SDRF Norms-a pest attack hnuaihan tanpuina hi pek theih a nih thu an sawi a; sazu puang tuartu loneitute hi DC-ah an report a, verification tih a nih chuan pek theihsa a nih thu leh hmalak zel dan tur chu sorkar hotuten an ruahman dawn thu an sawi.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

TAXATION DEPARTMENT

Sorkar kum kal mekah April atanga November, thla 8 chhungin Taxation department chuan kawng hrang hrang atangin chhiah cheng nuai 86,523 a hmu tawh a; thla liamta November khan cheng nuai 7,909 a hmu.

Taxation department-in Mizorama chhiah hmuh zat (monthly/annual achievement)-a tarlan danin, kumin April - November thla chhung khan kawng hrang hrang atangin chhiah cheng 86,523 hmuh a ni a; Goods & Services Tax (GST) atangin cheng nuai 7,279 hmuh niin, chhiah hmuhna tam ber a ni a, GST atanga chhiah hmuh hi Taxation department-in chhiah a hmuh zawng zawng atangin za zela 90 point 3 a tling a ni.

November thlaah hian GST dawta chhiah hmuh tamna ber chu Sales Tax niin, cheng nuai 325 hmuh a ni a, a dawttu Profession Tax aṅgin cheng nuai 117 hmuh a ni.

Petrol leh diesel aṅga sorkarin chhiah chi hnih a lakna Road Maintenance Cess leh Social Infrastructure & Services Cess aṅgin cheng nuai 93 ve ve hmuh a nih bakah Entertainment Tax aṅgin Rs 10,000 hmuh a ni bawk.

Sorkar kum kal meka thla 8 chhung hian GST aṅgin cheng nuai 61,599 hmuh ni tawhin a tam ber a; Sales Tax aṅgin nuai 16,962, Profession Tax aṅgin nuai 1,313, Road Maintenance Cess leh Social Infrastructure & Services Cess aṅgin cheng nuai 3,323 ve ve bakah, Entertainmet Tax aṅgin Rs 50,000 hmuh a ni tawh a ni.

<><><>

RUSSIA PRESIDENT

Prime Minister Narendra Modia leh Russian President Vladimir Putin te chu vawiinah New Delhi-ah an inkawm dawn. Hruaitu pahnih te hian ram pahnih inlaichinna chungchang an thlirlet ang a, an chhehvel leh khawvel thil thleng pawimawhte an sawidun dawn bawk a . Hei bakah hian inremna engemawzat ziah beisei a ni a. Sumdawonna lamte, eibar zawnnate, healthcare, academics, culture leh media lamahte thawhdunna tur inremna ziah beisei a ni.

Russian President Vladimir Putin hian nimin tlai khan ni 2 cham turin New Delhi a lo thleng a. A cham chhungin India-Russia Annual Summit ah a tel dawn a. Hruaitu pahnihte hian an chhehvel leh khawvel pum thil thleng pawimawh tak takte an sawidun dawn a.

<><><>

CENTRAL EXCISE

Parliament chuan nimin khan Cenrtal Excise (Amendment) Bill, 2025 a pass. He bill hi Lok Sabha-ah pass anih hnuin nimin khan Rajya Sabha-ah sawiho a pass niin Lok Sabha ah thawnlet a ni a. He dan thar hian Central Excise Act,1944 a rawn siamtha dawn a. Excise duty a tihpun abakah vaihhlo siamchhuah atanga chhiah a a tihpung dawn a. Heng cigarette, cigar, hookah tobacco, sahdah, zarda leh scented tobacco ah te chhiah hi lak pun a ni ang.

Union Finance Minister Nirmala Sitharaman-i chuan dan siamthat chu thil thar anih loh thu leh chhiah tihpunna a ni lo a ti a, GST awm hma atang daih tawha chhiah lo lak dan anih thu a sawi a ni.

<><><>